

ՈՂՋՈՅՆ ԽՐԻՄԵԱՆ ՀԱՅՐԻԿԻՆ

Հայ ազգը հրճւանքի մէջ է: Նա, որին Ազգը միահամուռ խորհրդով միաձայն կոչել էր ս. Լուսաւորչի Գահը բարձրանալու համար, նա ինքն է, որին Ռուսաց Օգոստափառ կայսրը հաստատեց իբր Կաթողիկոս Ամենայն Հայոց: Եւ Ազգի Հայրապետը այսօր մեր մէջն է, նա որ, Հայրապետ լինելուց առաջ, արդէն վաղուց Հայ Ազգի Հայրն էր: Անսահման է հայութեան ուրախութիւնը, տեսնելով մի այդքան արժանաւոր անձն իբր պետ Հայաստանեայց Եկեղեցու, այն Եկեղեցու, որը այնքան և այնքան սերտ կապերով իրան կապւած է ուղում տեսնել Հայ Ազգի վիճակի հետ: Եկեղեցու սերտ կապը ազգութեան հետ—նորան ազգային է դարձրել, ժողովրդական հիմքերի վրայ կառուցւած լինելը—նորան դարձրել է ժողովրդական: Եւ ցնծում է այսօր այն ամենը, ինչ ազգայնութիւն է ներկայացնում, և մեծ մխիթարութիւնն այն է, որ դորա հետ միասին ժողովուրդն է ցնծում, ցնծում է բաց և անկեղծ սրտով: Ժողովուրդը այսօր ողջունում է իւր այն հոգեւոր պետին, որի անձի մէջ մարմնացած են գերազոյն առաքինութիւնները, որոնց ընդունակ է հայել խելքն ու սիրտը: Խրիմեանը 19-րդ դարի մի հանճար է, և, իբր այդպիսին, նա մէկն է իւր ժամանակի մարդկութեան լաւագոյն ներկայացուցիչներէից: Պարծանք հայութեան—նա պարծանք է և համայն մարդկութեան:

Խրիմեանը զազափարի մարդ է: Եւ ինչպէս բոլոր զազափարական մարդիկ, նա կրող է մտքերի, որոնք ժամանակով են հասունանում և ընդհանրութիւնից ճանաչուում: Այսօրւայ Հայոց Կաթողիկոսը իբր անձն և ուղղութիւն նկատուած է ոչ երեկւանից, այլ աւելի քան երեսուն տարի առաջ: Այդ ուղղութիւնը շկոյա է ստեղծել և աշակերտներ է հասունացրել. այդ ուղղութիւնը շփւել

է այլ շկոյաների հետ, մրցութեան մէջ մտնելով. և իւր ոյժով նա իւր համար ճանապարհ է հարթել ու թափանցել աղգի բոլոր խաւերի մէջ: Իսկ հերոսը — այժմ եօթանասունը անց ծերունի — ողջ առողջ կանգնած է մեր մէջ նոյնքան կենդանի ոգով ու մտքով, որքան առաջ:

Խրիմեանները գալիս են ոգի տալու, ոգի ներշնչելու համար: Նոցա միակ գործը չէ այս ու այն բանը կարգադրել. այդ նոցա գործն է իբր պաշտօնեաների. բայց պաշտօնեայից դուրս Խրիմեանների մէջ յատուկ անձնաւորութիւններ կան, որոնք իրանց ժամանակը կապում են նաև հեռաւոր ապագայի հետ: Այդ է որ ներկայ Խրիմեանին դարձնում է մեծ մարդ, պատմական անձնաւորութիւն:

Մտքեր և զգացմունքներ կան, որոնք թւում են ընդհանրութեանը որպէս միայն երևակայութեան մէջ գոյութիւն ունեցող, որպէս ուտոպիաներ: Առանց չափազանցութեան կարելի է ասել, որ Խրիմեանը այն անձնաւորութիւններիցն է, որոնք դալիս են ժողովրդի առաջ կանգնում՝ հաւատ ներշնչելու համար դէպի ուտոպիական երևացող գաղափարների գոյութիւնը և իրականանալու հնարաւորութիւնը: Այդպիսի մարդկանցով է ընդհանրութեան ոգեկան մակերևոյթը բարձրանում: Խրիմեանների գոյութիւնով մարդկութիւնը ազնւանում է և դրդած է զգում դէպի վսեմը, դէպի դադափարականը, դէպի ընդհանուր մարդկայինը, դէպի մաքրութիւնը, դէպի պարզութիւնը: Նա թանկ է մեզ համար որպէս ուսուցիչ, դաստիարակ, քարոզիչ: Երբէք այդպիսիները չեն անցնում առանց մեծ հետք թողնելու իրանց ետևից: Եւ այսօր, հազարաւոր ամբոխը ոչ միայն ողջոնում է նորան, այլ և առանց այդ զգալու՝ նորա հետ շփւելով՝ կրթւում է, դաստիարակւում է և իդէալներ է ստանում:

Եւ մենք, ու մեզ հետ մեր խմբագրութեան բոլոր գործակիցները, միախառնւելով ժողովրդի այդ անկեղծ ձայների հետ գոչում ենք՝
Կեցցէ Խրիմեան, կեցցէ Հայրիկ, կեցցէ Կաթողիկոս!

ԱՒԵՏԻՔ ԱՐԱՍԽԱՆԵԱՆՑ: